

Tito Mboweni o kgathile tema ya bohlokwa botsitsong ba boholo ba ikonomi ya Afrika Borwa

Tshwane, 13 Mphalane 2024 – Ditshebeletso tsa Lekgetho tsa Afrika Borwa (SARS) di hetla morao ka tsela e ikgethang ho hopola ya seng a robetse e leng Mong. Tito Mboweni ya ileng a thusa ho tlisa botsitso lepatlelong la ikonomi ya rona mmoho le tema eo a e kgathileng jwalo ka Mmusisi wa Banka ya Risefe le ho ba Letona la Ditjhelete, ka ho sebetsa ka katamelo le SARS jwalo ka karolo ya lelapa le leholwanyane la tsa Ditjhelete.

Nakong ya dilemo tse leshome ho tloha ka 1999 ho isa ho 2009, e bile Mmusisi wa Banka ya Risefe, nako ya dilemo tse leshome e neng e tsamaisana le ya dilemo tse 10 tsa mofu Mong, Pravin Gordhan eo e neng e le Khomishenara ya SARS. Ebile dilemong tsena tse leshome moo ho bileng le botsitso ba boetapele, mmoho le Mong. Trevor Manuel jwalo ka Letona la Ditjhelete, bo ileng ba thusa SARS ho ipeha ka tsela e mawala le ho ba bolaodi ba lekgetho ba sekwalekwale lefatsheng ka bophara.

Ha ho potefolio ya mmuso e bileng le botsitso bo jwalo ba boetapele ba nako e telele jwalo, mme yona hantlentle e ne le bohlokwa ho ahweng ha demokrasi ya rona le ho ntlafatsweng ha ditheo tse kang SARS le Banka ya Risefe.

Khomishenara ya SARS Edward Kieswetter o hopotse Mong. Mboweni e le e mong wa meloko ya baetapele ba batjha ba ileng ba beha ka pele ntwana e neng e le kgahlano le kgethollo eo ka nako eo ho neng ho bonahala eka mmuso ka bonnyane bo ne bo keke ba hlolwa.

"Mong. Mboweni o ile a itela mme a intsha sehlabelo ho fihella sepheo sa rona sa tokoloho tlasa boemo bo sa kgetholleng borabe, bo sa kgetholleng bong le ba demokrasi. Moloko wa hae o tsejwa ka hore ke "madinyane a ditau" ka lebaka la sebete le boitelo ba bona. Ka lebaka la seo, SARS e thoholetsa ntwana ya hae kgahlano le puso ya bonnyane le ho aha demokrasi ya rona. Boetapele ba hae jwalo ka Letona la Ditjhelete bo tlile ka nako e bohlokwa haholo nalaneng ya SARS ka mora hore e thefulwe ke kgoholeho e neng e hlophisitswe ka boomo ya puso ka sepheo sa ho etsa manyofonyofo. Ebile mofu Letona Mboweni ya ileng a phethahatsa kgothaletso e ileng ya hlahiswa ke Komiti hore Mopresidente a nkgethe ho ba Khomishenara ya SARS.

Haesale ho tloha ka Motsheanong 2019, ke bile le monyetla wa ho sebetsa ka katamelo le Tito Mboweni, nakong re neng re qala leeto la ho aha botjha SARS, ka mora nako ya kgapo ya mmuso. Ha re ne re lebile dikgethong tsa morao tjena, Tito o ile a ntetsetsa mme a nkgothaletsa ho tswela pele ka mosebetsi oo re o etsang mona SARS, a bile a toboketsa ka moo ho leng bohlokwa kateng ho se fele matla ntlafatsong ya demokrasi ya rona. O ne a lomahantse meno ho thusa e seng feela matsapeng a kahobotjha empa le ho netefatseng hore SARS e boela e kgutlela maemong a yona a ho ba setheo se tlotlwang setjhabeng sa rona. Dikeletso tsa hae tsa bohlokwa le tshehetso ya hae e sa thekeseleng hodima thomo ya SARS ya ho bokella tsohle tse tshwanetseng Mmuso di tla hopolwa haholo. Sena se tla kapele ka mora ho hloka-hloka ha Mong. Gordhan mme lefu lena le sa lebellwang rona re le SARS mmoho le setjhaba sa Afrika Borwa le bohle ba ratang naha ya bona le re amohile motho ya hlwahlwa le ya bohlale ka ho fetisisa.

Tsamaya hantle Tito, o kgathile ya hao tema, re tla tswela pele ka leeto la ho ntlafatsa maano a rona a tsa ditjhelete mmoho le bokgoni ba rona ba taolo molemong wa Maafrika borwa kaofela."

SARS e lebisa matshediso le kutlwelobohloko ho lelapa le ba leloko la Mboweni mabapi le ho hlokahala ha Letona lena la mehleng la Ditjhelete.

Hamba Kahle!

Ho fumana lesedi le fetang lena, ka kopo ikopanye le SARS ho SARSMedia@sars.gov.za.